

DERECHU A ALBORTAR: DECIDIMOS NOSOTRES

Les actuaciones xudiciales de va poco qu'acabaron con delles muyeres nos xulgaos por interrumpir voluntariamente'l so embarazu, fain que rescample la situación d'inseguridá xurídica na que nos dexó a les muyeres la llei del albuertu que s'aprobó nos años 80: un cierre en falso pa un problema qu'afecta a decenes de miles de ciudadanos tolos años.

Pa esta llei l'albuertu ye un delitu, despenalizáu namás si se da dalgún de los tres supuestos sabíos: forciamientu, malformación fetal o peligru pa la salú física o psíquica de la madre.

Énte esta situación, primero de too queremos manifestar el nuestro apoyu total y la nuestra solidaridá coles muyeres investigaes por albortar y con les y los profesionales que fixeron por ello hasta güei.

Tamién queremos denunciar la campaña violenta entamada polos sectores relixosos más fundamentalistes y les derechos políticos ultraconservadores, que nun tienen reparu en promover actuaciones xudiciales y n'usar la medrana, les amenaces, la mentira, l'insultu y incluso la violencia, lo mesmo física que verbal, con tal d'imponer el so modelu de familia patriarcal, que va contra la llibertá de les muyeres y básase nel control de la nuestra sexualidá.

Güei, les organizaciones del movimientu feminista, partíos, sindicatos y entidaes que convocamos esti actu, les muyeres y los homes que participamos nesta manifestación, esiximos a los poderes públicos, instituciones y partíos políticos y, sobre manera, al gobiernu que salga de les urnes el 9 de marzu, un compromisu claru y decidíu pa que l'albuertu sía reconocíu como un derechu que les muyeres puedan exercer dende la so decisión llibre y que tea garantizáu na rede sanitaria pública.

Un derechu que se contextualice nun marcu normativu curiosu que nos garantice'l nuestro derechu a la salú na so acepción más amplia y, d'esta manera, nos confirme los nuestros derechos sexuales y reproductivos y s'acompañe de midíes qu'aseguren la educación sexual en tolos centros escolares y l'accesu a los métodos anticonceptivos y a la anticoncepción d'emergencia con cargu a la Seguridá Social.